

李勤岸：海翁宣言

阮無愛 koh 新婦仔形

痾痾 khiā tī hia

講家己是一條蕃薯

Hō豬食 koh hō人嫌

從今以後阮 beh 身軀掠坦橫

做一隻穩穩在在 ê 海翁

背向悲情 ê 烏水溝

面向開闊 ê 太平洋

阮小可曲痾 ê 形狀

M是 teh 搯五千年 ê 包袱

是阮 beh kā 家己彎做

希望飽滿 ê 弓

隨時 beh 射出歡喜 ê 泉水

隨時 beh 洩向自由 ê 海洋

當阮 ê 生存 hō人威脅

阮會用阮堅實 ê 身軀

Piaⁿ向海岸

用阮 ê 性命

見證阮 ê 存在

—錄自《李勤岸台語詩選》